

von Wulf Wager

Militante Veganitarier



Viel Leut sind jo heut aus Tierschutzgründe eingefleischte (!) Vegetarier. Des ka jo jeder halta wianr will. Mei Dochdr isch au Vegetarierin, derra schmeckt halt 's Floisch net. De Härtere send aber d' Veganer, die essat net bloß garnix Tierisches, dia ziehat au koine Lederschuh ond koin Wollpullover an - oifach garnix Tierisches. Des isch scho fascht a Glaubens-

richtong. Ka mr jo macha, wemmr will. Jeder für sich. In letschter Zeit tauchat aber emmer me militante Veganer auf, dia moinat, sie miasstat oin bekehra. So ebbes ka i et leida. Wer Toleranz für Intoleranz fordert soll doch bidde a bissle Toleranz für mei Intoleranz gegenüber seira Intoleranz ufbringa. Wo kommat mr denn sonscht na?

Auf dr Alb isch scho soweit, dass dia Gaschtwirt auf de Tische von Vegetarier oder Veganer bloß no Plaschtikbluma stellat. Jetzt gibt's jo neurdings Wurscht, Schnitzel ond Floischkiachla ohne Floisch. Ja wa glaubat'r was do an Chemie drenna isch? Des isch so künstlich wia a Cola. Des ka gwieß et xond sei. Aber äll Woch wird a andere Sau durch's Dorf trieba. Näggschd Woch machat se vielleicht Spätzla ohne Mehl ...

Für mi tauchat, wenn i übr Veganer ond Vegetarier nochdenk, a ganze Roih von Froga auf: Dürfat Vegetarier Schmetterlinge em Bauch han? Essat Vegetarier Blutorange? Ond was isch mit Orangasaft mit Fruchtfloisch? Hend Vegetarier Fleischeslust?

Hend Sie gwisst, dass es Viecher gibt, die Viecher fressat? I ben jo indirekter Vegetarier: I ess bloß Tiere, die sich vegetarisch ernährt hend. Vegetarier ond Veganer werdat übrigens wega dr floischlosa Koscht net älter, dia sehat bloß älter aus. Dr Ondrschied zwischa ma Vegetarier ond ma Floischesser isch au bloß, dass dr Vegetarier xündr stirbt. Aber au Vegetarier beißat net gern en Gras.

Bis näggschd Woch'

Ihr
Wulf Wager

A handwritten signature in black ink, appearing to read 'Wulf Wager'. The signature is stylized and written in a cursive-like font.

Alle Kolumnen zum Nachlesen unter www.woascht.de